

## W8BANAKI

Christine O'Bomsawin-Lamirande

**N**d'aliwizi Christine O'Bomsawin-Lamirande. Kizi nd'aln8baï Odanak. Kizi nd'aï nw8banaki m8wkaw8ganek lli ngwed8nkaw kassigadmak ni almite-bilh8k Boucherville. Kizi n'pedgipaï8 Odanak nasinska taba nis kassigadmak. N'waj8n8 nlhoak aw8ssisak ta achi osesak. N'wlito nt8walokaw8gan ni n'pitta wigi awikhiga. Wji nia, awikhigaw8gan nda ibiwi n'chigitawi polwa k8kizgaki ngajow8gan kanwa achi mikawidah8zi, wji ndaw8ssisemak ta nosesak, pilwal8wzow8ganal.

## KZEL8MSENILINTOW8GAN

**P**asojiwi sibok, Awassosis namiha pitta kchi aln8ba, odanaïwaw8damwinno.

Wa kizi wd'abo kwinapskok ni alin8gwezo wazasshiga witkwaljial wskijiwi maskwak.

Awassosis pasodokawa kchi san8ba. W'kinamen maskwa, kanwa ndakagwi w'namitowen.

— Awassosis nadodmawa: Kagwi kd'aloka?

— Kchi san8ba 8zidawa: Nd'awikhiga kagwi wji kzel8msenilintow8gan.

— Kzel8msenilintow8gan? Awassosis idam: Kagwi ni? Ndakagwi wskijiwi maskwak.

— Mina kina, idam waw8damwinno.

— Tagdatta ndakagwi n'namitowen, 8zidawa Awassosis.

Ninawa kchi san8ba idam: Tbestawi, k'n8ji 8tlokawol nd8tlokaw8gan nspiwi kzel8msenilintow8gan.

N8wat, kwani sagp8wl8msenek, odanaïphanem kizi gw8zilha ni asma w'pedgipaïawi.

Ni agwa, n'kizito abi pasojiwi sibok ni n'nadodmaw8  
kzel8msenek: K'wawaldam t8ni ao na phanem?

Kzel8msen idam: Awighiga na phanemiliwizow8gan  
wskijiwi maskwak ni wd'alintoji nspiwi nia.

Nikw8bi, chiga n'kadi nodamen na phanemi-  
lal8mow8gan, nd'abi pasojiwi sibok, nd'awikhiga  
wd'aliwizow8gan wskijiwi maskwak ni n'tbestamen  
kzel8msenilintow8gan.

Sagp8wl8msen kizi m8jalab niswiak, kanwa kizi  
w'pedgipaia kzel8msenilintow8ganek.